

Kapiya Sën Pita Kevu Muginsën Vu Kerisi-yi-alam

1 ¹ Sa Pita sën Yesu Kerisi yi sinarë sa. Sa nekevu kapiya sënë yök vu ham sën Anutu-yi-alam ham, sën ham vuu begganğ degwa ya geham yök nedo jeggın jeggın vu distrik Pontus los Galata geKapadosia, gAsia* los Bitunia aga. ² Hil Amad Anutu rağ ham nimin ggovek ya yö wirek beggooin ham rağ tu yi nğaa. Lob Anon Vabuung vonğ beham tu vabuung in bë ham sepa doğ Yesu Kerisi aye beniğök jipek ham beham nimin vesa jağ. Anutu gevonğ semusemu nyëmasën vu ham rot beham ayomin gëp revuh pangsën rot.

Mala-tumsën Soğek Neğın Hil Vu Yağek

³ Hil gağo Anutu arë jağ. In yi Anutu behil Mehöböp Yesu Kerisi Ama yi. Kwa pesiv in hil böpata rot, lob vonğ beYesu Kerisi kedi rağ yah vu bedub, lob vonğ behil atu mewis ggovek ya rağ yi. Lob hil medo navo kwad in buk sën Anutu geğo hil nah lo gehil su nehevuu rë. ⁴ Ggooin hil rağ ggovek ya in bë hil gağo nğaa nivesa vesa rot vu yağek. Nğaa sënë semu yi ggovek geneğın ham vu yağek. Lob su yoh vu bë rëğ petar benipaya jağ rë, gağ yö nivesa anon gesu rëğ mala nama rë. ⁵ Ham ayomin neya timu vu Anutu, lob neğın ham nivesa rağ yö niwëëk, om ham rëğ medo nivesa rot. Semu aggata in bë geğo ham nah vu yi yonon, lob rëğ gevonğ sënë banon jağ begëp rangah doğ Buk-tamusën. ⁶ Mağ yik nğaa maggin aggagga netök vu ham hus dus teka mu loğ buk sagi meneseggi ham beham ayomin maggin teka. Rëğ ma geham kwamin nevo bë Anutu rëğ geğo ham nah vu yi, lob ham kwamin vesa rot. ⁷ Anutu neseggi ham rağ nğaa nebë sënë in bë jağ ni nabë ham ayomin neya timu vu yi ma ma. Hil arak ni bë goor og denevesi rağ nengwah in bë kale kale geto in genivesa jağ, rëğ mu goor sënë rëğ mala nama vu tamusën. Gağ sën hil ayod neya timu vu yi lo, og su nebë goor sënë rë, gağ kesuu goor genivesa rot. Om nabë nğaa vahi seggi ham gwëbeng in

ham ayomin neya timu bevong bë nengwah gga ham, og sagaḵ nevonḡ in bë ham bare nimin week. Lob vu tamusën sën Yesu Kerisi natök nom rangah lo, og ham rëḵ natu alam los arëmin böpata bemalamin ngeri gebengömin na jaḵ sën ham ayomin ya timu agi. ⁸Ham ngo nahën geham su malamin raḵ yi rë, rëḵ ham ahëmin neving yi. Yönon, ham ngo nahën gesu lë yi rë, rëḵ ham ayomin neya timu vu yi los kwamin vesa in yi rot. Ham kwamin-vesa-sën sënë kesuu hil kwad-vesa-sën sën hil kwad vesa in ngaa vu dob agi pin. Lob hil ayed su neggëp beyoh vu bë nanër kwa-vesa-sën sënë rangah metateḵin rë, gaḵ ma veröḵ yi. ⁹Lob sën ham ayomin neya timu vu yi agi anon nebë: Anutu rëḵ geḵo ham anomin nah bedemedo malaj-tumsën geving yi. ¹⁰Alam-denenër-gaḡek-rangahsën denesero rot medenevonḡ huk niwëëḵ in bë denatök vu gaḡek sën Anutu geḵo hil nah lo degwa, lob denër gaḡek rangah raḵ ngaa sën töḵ vu ham gwëbeng agi. ¹¹Kerisi yi Anon Vabuung nedo loḵ alam-denenër-gaḡek-rangahsën sagi ayoj lob nër gaḡek rangah verup avij muḡin raḵ Kerisi bë: Vanë aggagga rëḵ natök vu yi, genahub rë loḵ rëḵ natu mehö los arë böp. Lob yö medo denesero gaḡek sënë degwa medeneloḵ tepëḵ in sir bë, “Vu buk tena rëḵ nam-a?” Gemak “Va ti rëḵ berup doḵ buk saga?” ¹²Anutu tato vu sir ggovek bë su denenër gaḡek saga rangah in bë doḵ vu sir rë, gaḵ denevonḡ huk in bë dedoḵ vu ham. Denḡo bengö sënë muḡinsën, lob Anutu vonḡ Anon Vabuung yam vu yaḡek bevo niwëëḵ vu alam vahi beyam denenër Bengö Nivesa rangah los degwa vu ham vu gwëbeng sagi ving. Lob yiḵ angër lo ahëj neving rot bë dekeḵooin medegelë ngaa sënë geving.

Anutu Tahi Hil Yam In Bë Hil Abo Vabuung In Hil

¹³Nebë saga, om ham su kwamin bo ngaa jeggin jeggin, gaḵ ham kwamin bo ngaa niröp geham medo revuh. Beham ayomin timu bemedo gweḡin sën Yesu Kerisi natök nom rangah begevong semusemu nyëmasën jaḵ na ham lo. ¹⁴Ham gwevonḡ nabë sën hurmahen denebë nengaj vu gaḡek medenesepa loḵ lo. Wirek og ham kwamin ma, om sën ham medo nesepa loḵ aggata malanon-yi. Gaḵ gwëbeng sënë og ham su sepa doḵ nah gökin. ¹⁵Gaḵ Anutu yi mehö vabuung betahi ham ggovek ya, om ham bo vabuung in ham in ngaa pin sën ham gwevonḡ lo nabë yi. ¹⁶In gaḡek neggëp loḵ Anutu-yi-ḵapiya bë, “Sa vabuung, om ham natu vabuung geving.”

Anutu Baḡo Hil Yom Raḵ Ngaa Böpata Rot

¹⁷Anutu og su kwa nevo hil arëd meneseggi bë ti tena kesuu rë, gaḵ neseggi hil ti ti raḵ ngaa sën hil nehevong lo. Om nabë ham ayemin doḵ ti benanër nabë Amamin, og ham gweḡin ham nivesa begöneng in yi noh vu buk pin sën ham nedo vatëveḵ mu vu dob agi. ¹⁸Ham raḵ ni bë wirek

og ham nedo los nḡaa nipaya sēn ham alam hib detahu ham loḵ lo, rēḵ Anutu vo ham vēr in nḡaa saga. Su baḡo ham yom raḵ seriva lu goor ma nḡaa-dob-yi sēn rēḵ mala nama lo ti rē. ¹⁹ Gaḵ baḡo ham yom raḵ Kerisi ni ḵōḵ. Yesu ni ḵōḵ sēnē su nebē nḡaa sēn hil nebaḡo raḵ monē bōpata rot lo rē, gaḵ kesuu. GeKerisi sēnē nebē sipsip nalu sēn yō nivesa rot gesu navi len ti nipaya neggēp raḵ yi rē, lob desis yi tu seriveng. ²⁰ Anutu su tungḡ dob sēnē rē geyō nahēn, log yō ggooin Kerisi raḵ vorot in bē gevongḡ huk sēnē. Rēḵ mu yō nahēn nedo bemēm Buk-tamusēn dus raḵ, lob tōḵ yam rangah in bē doḵ vu ham. ²¹ Loḵ vu ham beham ayomin ya timu vu Anutu sēn vongḡ beKerisi kedi raḵ yah vu bedub bevongḡ arē bōp raḵ lo. Yōnon, ham ayomin neya timu vu Anutu benevo kwamin in yi los ahēmin nivesa bē rēḵ nom begeḵo ham nah.

Hil Ahēd Geving Hil Arid Sēn Kerisi-yi-alam Lo

²² Ham nesepa loḵ ḡaḡek anon sēnē, lob vongḡ beham ayomin nivesa raḵ. Lob ham los hil arid lo nelē ham nivesa. Ham su nevongḡ los kwamin luu rē, om ham pasangḡ gwevongḡ huk niwēēk rot beham ahēmin geving ham vewen vewen pangḡsēn. ²³ Ham tu mewis ggovek ya nebē sēn nos kip loḵ huk anon. Rēḵ mu ham su pum raḵ nos ḡahis sēn nepetar lo rē! Gaḵ ham pum raḵ nos ḡahis sēn nedo degwata lo. Nos ḡahis sēnē og yiḵ Anutu yi ḡaḡek, lob mala-tumsēn neggēp loḵ beyō rēḵ ḡēp degwata los degwata. ²⁴ In ḡaḡek neggēp loḵ Anutu-yi-ḵapiya bē:

“Mehōnon pin nebē vos.

Log hir vuneḵ vuneḵ nebē vos anon kweḵsēn.

Vos nemeran log anon kweḵsēn nerurin to.

²⁵ Gaḵ Mehōbōp yi ḡaḡek, og yō neggēp degwata los degwata.”
ḡaḡek sagi og yiḵ Bengō Nivesa sēn denenēr rangah vu ham lo.

Mehōbōp Tu Ḡelōng Nivesa Sēn Mala-tumsēn-yi

2 ¹ Om ham su gwelē ham paya, geham su tetuhin ham. Ham su gwevongḡ kwamin luu, geham su ayomin ngis yi vu mehō ngwē, geham su nanēr ḡaḡek nipaya nah nenga jaḵ mehō ngwē. ² Ham nebē hurmahen niḵōḵ sēn ataj nahēn neḵo sir bahēj neving rur mu lo. Om yiḵ ham pasangḡ ahēmin geving rur sēn nelōḵ vu ham anomin lo. Ham nanum rur sēn su desarōmin nḡaa kuungsēn ving rē agi pangḡsēn, in gevongḡ beham jig bemedo nivesa geving Anutu. ³ Yōnon, maḵ ham seggi Mehōbōp ggovek ya beham raḵ ni bē kwa nevongḡin ham rot. ⁴ Om ham ngo nam vu yi in mehō mala-tumsēn-yi, beniwēēk rot nebē ḡelōngḡ ti. Mehōnon denekuung bē maḵ ḡelōngḡ nipaya om sēn deruuk ya. Rēḵ mu Anutu ggooin yi raḵ vorot benelē bē nḡaanon benivesa rot. ⁵ Lob vongḡ bē yiḵ ham nebē ḡelōngḡ mala-tumsēn-yi saga ving, om Anutu kwa nevo bē gevongḡ beham natu Anon Vabuung yi beggāng. Nebē saga om ham natu

alam-deneḱo-seriveng niröpsën-yi lo, beham ngo gwetung ayomin natu seriveng vu Anutu. Nabë ham gwevonḱ nabë saga, og Anutu rëḱ kwa bo ham nabë Yesu Kerisi yi alam ham, lob geḱo seriveng saga. ⁶In ḱaḱek raḱ nḱaa sënë meneggëp loḱ Anutu-yi-ḱapiya ving nebë:

“Ham gwengo rë!

Sehooïn ḱelöng malangeri anon rot ti raḱ in ḱadu begganḱ nyë ḱetu, lob gwëbeng sa varah menare nyëḱ böp Sion.^a

Om nabë mehöti ayo na timu vu yi, og su rëḱ ni namum rë, gaḱ rëḱ nama veröḱ yi.”

⁷Kerisi nebë ḱelöng sënë lob ham sën ham ayomin neya timu vu yi lo, og ham nelë bë nḱaanon benivesa rot. Gaḱ alam sën su ayoj neya timu vu yi rë lo, og ḱaḱek raḱ sir meneggëp loḱ Anutu-yi-ḱapiya nebë:

“Alam sën denelev begganḱ lo nij lëlin ḱelöng ti sënë, rëḱ mu mëm sënë netu ḱelöng niwëëḱ begganḱ nyë ḱetu yi.”

⁸Log ḱaḱek ngwë nër bë:

“Netu hir ḱelöng sën deketul vahaj jaḱ lo.

Genetu hir ḱelöng sën detaleḱ medebës lo.”

Su devonḱ ving Anutu yi ḱaḱek sënë rë, om detaleḱ medevës, in Anutu nër wirek bë rëḱ degevonḱ nabë sënë.

Hil Natu Anutu Yi Hur Maluh Los Avëh

⁹Rëḱ Anutu ggooin ham raḱ ggovek ya tu yi alam. Ham tu Mehö-los-bengö Anutu yi alam-deneḱo-seriveng. Ham tu alam yu vabuung ti. Ham tu Anutu-yi-alam niröp in bë ham rëḱ tateḱin nḱaa nivesa pin sën nevonḱ vu ham lo. In ham nedo loḱ malaxenu wirek, rëḱ tahi ham beḱo ham loḱ yam yi rangah nivesa anon sënë ayo. ¹⁰Wirek og ham alam meris, rëḱ gwëbeng og ham tu Anutu-yi-alam. Wirek og ham nedo nenga in Anutu lob su kwa nevonḱin ham rë, rëḱ gwëbeng sënë og Anutu kwa nevonḱin ham.

Hil ḱevonḱ Nḱaa Nabë Sën Anutu Yi Hur Hil

¹¹Sa mehö lo, sahëḱ neving ham, om sa nanër vu ham niwëëḱ nabë: Ham nedo dob sënë nebë ham alam-nyëḱ-ngwë los alam vatëveḱ mu. Om ham dëëin nḱaa malanon-yi sën hil navid nevonḱin lo na. In nḱaa nebë sënë nesis begö vu ham ḱenumin. ¹²Ham gwevonḱ nḱaa nivesa doḱ alam dahis vuheng. Yönon, denenër ḱaḱek nipaya raḱ ham gwëbeng bë ham nesepa loḱ nḱaa nipaya. Rëḱ mu rëḱ degelë nḱaa nivesa sën ham nevonḱ lo, lob rëḱ degeḱo Anutu arë jaḱ in ham huk sënë doḱ buk sën natöḱ nam in bo nyëvewen vu sir lo. ¹³Ham tu Mehöböp yi alam om ham sepa doḱ

^a 2:6 Denenër nyëḱ böp Yerusalem arë ngwë nebë Sion.

horek sën mehönön denejoo lo pin. Ham sepa doḵ mehö-los-bengö sën netu yuseḵë vu dob lo aye. ¹⁴Geham sepa doḵ ggev gavman ayey nabë saga. In mehö-los-bengö ggooin sir raḵ in bë debo nyëvewen doḵ nah vu alam sën degevonḡ nḡaa nipaya lo, gedegeḵo alam sën degevonḡ nḡaa nivesa lo arëj jaḵ. ¹⁵Anutu ahë neving bë ham sepa doḵ nḡaa niröp nabë saga in alam kwaj masën sën sir duḡin ḡaḡek lo, su denatōḵ vu ḡaḡek nipaya jaḵ ham medenanër. ¹⁶Ham su nabë alam sën detu mehö ngwë hir nḡaa meris balaj deneḡinengin nḡaa maggin raḵ sir gedenevasap sir lo, gaḵ ham gwevonḡ nḡaa nabë alam sën yö deneḡin sir lo. Rëḵ mu ham su gwebom navimin doḵ mu log ham bun ham in nḡaa nipaya megwevonḡ, gaḵ ham natu Anutu yi hur yönon. ¹⁷Ham gweḵo alam pin arëj jaḵ, geham ahëmin geving arimin lo sën Anutu-yi-alam sir lo. Ham ḡöneng in Anutu, log ham gweḵo mehö-los-bengö sën tu yuseḵë lo arë jaḵ.

Hil Sepa Doḵ Kerisi Vaha Meḡaḵo Vanë

¹⁸Ham sën hur lo, ham ḡöneng in alam sën denebaḡo ham netu hir nḡaa meris medeneḡin ham lo, beham ḡurek babuj in nḡaa pin. Ham su ḡurek alamin sën nijvesa los malaj yes lo mu babuj. Gaḵ yik ham ḡurek alamin sën denevonḡ nij paya vu ham lo babuj geving.

¹⁹Kë! Log nabë degwa nama geyö debo vanë vu ham meris mu rëḵ mu ham najom ham ahon geham gwengö vanë in Anutu-yi-alam ham, og yik ggovek. In Anutu ahë neving nḡaa nebë saga. ²⁰Gaḵ nabë ham gwevonḡ nḡaa nipaya ti lob dengis ham rëḵ yik ham gwelë sir mu, og ham su vonḡ nḡaa nivesa in bë degeḵo ham arëmin jaḵ rë, gaḵ ma. Gaḵ mëm nabë dengis ham jaḵ nḡaa nivesa sën ham gwevonḡ lo rëḵ ham gwelë sir mu, og mëm Anutu nenër saga bë ḡevonḡ nivesa. ²¹Yönon, Anutu ggooin ham raḵ in bë ham sepa doḵ aggata saga. In Kerisi loḵ yah ham bömin beḵo vanë betato saga vu ham in bë ham sepa doḵ vaha.

²²“Su nevonḡ nḡaa nipaya rë,

log su nenër ḡaḡek kuungsën ti verup avi rë.”

²³Denër pelë raḵ yi, rëḵ su nër pelë loḵ yah raḵ sir rë. Log devo vanë vu yi, rëḵ su nër ḡaḡek ahë sengën loḵ yah raḵ sir rë. Gaḵ yö vonḡ yi loḵ ya Anutu sën neseggi nḡaa pin niröp lo nema. ²⁴Yö ti ḵo nyëvewen loḵ yah hil nḡaa nipaya raḵ yah navi bediik raḵ ḵelepeḵo*. Vonḡ nebë sënë in bë hil ḡevuu nḡaa nipaya pin na, gehil medo vesad besepa doḵ nḡaa yohvu mu. Devasap navi lob saga vonḡ beham nimin vesa raḵ. ²⁵Wirek ham nebë sipsip ata main nalu geyö vare deneya jeggin jeggin bedeneketul loḵ in aggata. Loḵ gwëbeng sënë og ham loḵ yom vu sipsip ala sën neḡin ham anomin lo.

Ḡaḡek Raḵ Maluh Los Avëh Sën Deḵo Sir Ggovek Lo

3 ¹Log ham avëh sën raḵ reggamin ggovek ya lo, og ham ḡurek reggamin babuj geving nabë saga. Log nabë sir la su denesepa loḵ

Anutu yi gägek rë, og ham avëh sën venëj ham lo gwevonğ ngaa niröp jağ buk in degelë bedegërin sir. Gağ ham su nanër gägek ngahisekë vu sir. ²Kë! In mëm degelë nabë ham neğin ham nivesa geham nesepa loğ aggata niröp, lob degërin sir. ³Ham su bunek vu navimin, geham su bii yumin viis, geham su bunek vu navimin jağ kupek nivesa vesa, geham su jöp tob malangeri aggagga in nabë alam degelë ham. ⁴Gağ mëm ham sejonğ ayomin peggo, in ngaa sën ham sejonğ ayomin jağ lo, og su yoh vu bë rëk nipaya jağ rë. In vunek vunek ham ayomin peggo yi sënë nebë: Ham ayomin gëp revuh, geham malamin yes. Og mëm Anutu rëk gelë nabë ngaanon benivesa rot. ⁵In avëh sën ayoj ya timu vu Anutu wirek medeneğin sir nivesa lo yik denevonğ nebë sagi. Denesejonğ ayoj rağ ngaa nebë sënë gedeneğgurek reggaj babuj. ⁶Sara nevonğ nebë sënë, benebë nenga vu regga Abraham aye, genenër yi bë “Mehö böp”. Om nabë ham nevonğ ngaa nivesa, geham su newamin nerağ benehöneng in ngaa la rë, og ham nebë sën Sara nalu lo ham.

⁷Log ham maluh sën avëh regga lo, ham gwevonğ nabë saga geving. Ham kwamin bo ham venëmin begwevonğ nivesa vu sir in ham los medo nivesa. Ham nahubin avëh in su nij wëek nebë ham rë. Ham kwamin bo sir in yik değo Anutu yi semusemu ving beham rëk medo malamin-tumsën doğ ti. Bë ham sepa doğ aggata sënë, og ngaa ti su rëk gëp begërin ham beham gwevuu jomrağsën na rë.

Hil Medo Los Ahëd Geving Hil

⁸Ggovek saga, om sa bë semu gägek hus nabë ham pin medo los ahëmin geving ham gekwamin pesivin alam pin. Ham kwamin bo arimin lo besemu sir, geham gwevuu sën ham ngo neğo ham rağ lo na. ⁹Bë alam degevonğ paya vu ham, og ham su bo nipaya doğ nah nipaya nyëvewen vu sir. Log nabë denanër gägek nipaya jağ ham, og ham su nanër gägek nipaya jağ sir doğ nah nyëvewen. Gağ ham gwevonğ ngaa nabë sënë doğ nah: Ham najom jağ na vu Anutu nabë gevonğ semusën vu sir. In Anutu ggooin ham rağ bë ham gwevonğ nabë saga in mëm ham gweğo semusën vu yi geving. ¹⁰In gägek neggëp loğ Anutu-yi-ğapiya bë:

“Nabë mehöti ahë neving bë medo nivesa
 los kwa vesa noh vu buk pin sën nedo mala vesa agi,
 gengaa maggin nama in yi,
 og yö gëgin avi besu nanër gägek nipaya,
 geyö gëgin daggen in su nanër gägek kuungsën.

¹¹Gağ geruu demi vu ngaa nipaya ga,
 gevonğ ngaa nivesa mu,
 geyö medo mala sepa sën ayo gëp revuh lo,
 bahë geving rot nabë natök jağ anon.

¹²In Mehöböp mala neggëp menelë alam sën nij röp lo beneloğ vu sir,

log netung nenga in hir jomraksën yoh vu buk pin.
Rëk alam sën denevong ngaa nipaya lo, og Mehöböp neraç nij,
lob nevo nyëvewen loç yah hir ngaa nipaya vu sir.”

Hil Ayoh Vu Bë Gaço Vanë Jaç Huk Nivesa Sën Hil Nehevong Lo

¹³Bë ham nimin wëëk mesepa doç ngaa nivesa mu, og re yoh vu bë rëk gevong paya vu ham-a? Maç rëk nama! ¹⁴Rëk mu nabë ham sepa doç ngaa niröp lob ham gweço vanë jaç, og ham kwamin vesa. Log nabë alam denanër nabë debasap ham in nabë ham göneng, og ham su göneng in sir benewamin jaç. ¹⁵Gaç ham gwetung Kerisi timu yö natu ham Mehöböp bemedo doç ham ayomin. Ham semu ham jaç buk pin in Bengö Nivesa sën ham medo negin agi. Loç mëm nabë alam dedoç tepëk in gaçek sënë degwa vu ham, og ham medo in nanër nah niröp vu sir. Rëk mu ham nahub nanër gaçek ahë yes nah vu sir jaç gaçek nivesa.

¹⁶Log ham ayomin yö gëp niröp menivesa rot. In nabë alam denanër gaçek nipaya kuungsën jaç ham in ngaa nivesa sën ham nevonç menesepa loç Kerisi vaha lo, og degelë benij namum. ¹⁷In nabë Anutu vonçin bë hil gaço kerus jaç ngaa nivesa sën hil nehevong lo, og yiç ggovek. Rëk mu nabë hil gaço vanë jaç ngaa nipaya sën hil nehevong lo, og sënëk su yoh vu rë.

Kerisi Diik In Bë Kevoh Hil Ngaa Nipaya Na

¹⁸Hil kwad bo Kerisi geving, in yiç diik beron timu sënë in kevoh hil ngaa nipaya na. Yi mehö yohvu rëk loç yah hil alam nid paya bed in bë geço hil nom vu Anutu. Tu mehönon raç lob mehönon desis yi mediik, rëk mu Anon og nedo bekedi raç yah menedo mala-tumsën. ¹⁹Log Anon sënë ya meloç ya vu mehönon kënuj sën denedo qarabus vu Nyëg Nipaya lo menër gaçek vu sir. ²⁰Loç sën Noa yi buk wirek lo, og alam sënë dekeyëh Anutu yi gaçek, rëk mu Anutu su newa raç mevo loç yah nyëvewen vu sir pevis rë. Gaç yö jom yi ahon menedo rot, geNoa semu yaç loç buk sënë, lob yiç sir yu mahen teka mu denedo vesaj loç yaç ayo. Sir maluh avëh yoh vu nemadvahi-bevidek-löö denedo mu gebël su rehöö sir rë. ²¹Bël sënë netahu bël-ripeksën sën neço ham yom lo. Bël sënë og su bël sën neço ham nimin ngöhek ya lo rë, gaç sënë sën nevonç beham netahi ya vu Anutu bë gevong beham ayomin mewis jaç lo. Lob neço ham yom degwa raç sën Yesu Kerisi kedi raç yah lo. ²²Kedi raç yah beyah nedo Anutu nema vesa vu yaçek, lob angër los hir ggev sën arëj böp lo, gengaa los niwëëk vu yaçek pin, deneggurek babu.

Hil Gëvuu Alam Dahis Hir Ngaa Na Gehil Gaço Vanë

4 ¹Ham kwamin bo nabë Kerisi ço vanë rot raç navi, om ham kwamin na vu niwëëk megwevong nabë yi. In nabë ham gweço vanë jaç

navimin, og ham vuu ngaa nipaya yi aggata ya ggovek ya. ²Nabë saga, in lob ham su newamin jaḵ in ngaa nipaya mesepa doḵ gökin nah noh vu buk pin sën ham medo dob agi. Gaḵ ham sepa doḵ Anutu kwa. ³Wirek og ham nevonḡ ngaa nebë sënë rot menesepa loḵ ngaa sën alam dahis ahëj neving pangсэн бë degevonḡ lo. Ngaa lo nebë sënë: Ham su nejom ham ahon rë, geham nevonḡ malamin anon in ngaa pin sën su yoh vu rë lo benevonḡ. Ham kwamin nevo baggëb lu ngaa loḵ ayomin; ham nenum raḵ buk meyumin nevonḡ paya; geham nevonḡ ahëmin ta menevonḡ nos böp genevonḡ ngaa nipaya loḵ ayo; geham nesupin ham benenum bël niwëëk pangсэн benevonḡ ngaa nipaya; log ham nekweyëh Anutu yi ḡaḡek genejom raḵ vu ḵeriing lu ngaa beneḵo sir raḵ. Rëḵ gwëbeng og ham vuu ya. ⁴Yönon, gwëbeng sënë og ham su nevonḡ ngaa nipaya benevasap ham raḵ ngaa jeggин jeggин ving alam dahis ggökin yah rë. Om sën denelëk in ham, lob denenër ḡaḡek nipaya raḵ ham. ⁵Rëḵ mu vu tamusën og alam dahis sënë yö rëḵ detateḵin hir ḡaḡek jaḵ ngaa sënë nah vu jaas böp sën neseggi ḡaḡek lo medegeḵo nyëvewen doḵ nah ḡaḡek sagi. In semu yi ggovek ya menedo in genḡo alam-diiḵsën los alam malaj vesa hir ḡaḡek meseggi. ⁶Yiḵ degwa raḵ ḡaḡek sënë om sën Bengö Nivesa töḵ ya vu mehönon diiḵsën ḵenuj betateḵin aggata vu anoj in bë denah medemedo malaj-tumsën geving Anutu. In navij diiḵ nebë sën Anutu nër vu muḡinsën bë mehönon pin navij rëḵ denadiiḵ lo vorot.

Hur Nivesa Netateḵin Anutu Yi Semusën

⁷Buk sën ngaa pin vonḡin govek na lo dus raḵ, om ham kwamin bo nivesa, geyumin sepëp jaḵ, beham najom jaḵ noh vu buk pin. ⁸Ham pasang napiiḵ vu aggata sën ahëmin geving arimin lo lo niwëëk rot kesuu ngaa vahi pin. In nabë hil ahëd geving mehönon, og hil rëḵ dahun hir ngaa nipaya ngahiseḵë na. ⁹Ham gweḡin arimin lo sën yam denedo ving ham lo nivesa, geham su gwevonḡ ayemin vu sir. ¹⁰Ham pin ti ti ngo ḵo Anutu yi semusën aggagga yoh vu ham nyëmasën, om ham gwevonḡ huk jaḵ in doḵ vu arimin lo. Lob mëm ham rëḵ natu hur nivesa in ham doḵ vu mehönon jaḵ Anutu yi semusën sagi. ¹¹Nabë mehöti tateḵin ḡaḡek, og tateḵin niröp noh vu Anutu yi ḡaḡek. Log nabë mehöti gevonḡ huk in doḵ vu mehö ngwë, og gevonḡ huk jaḵ Anutu niwëëk sën vo vu yi lo. Hil ḡaḵo Yesu Kerisi arë jaḵ na vavunë. In niwëëk pin neggëp vu yi degwata los degwata benevonḡ semusën saga yam vu hil in bë hil gevonḡ bAnutu arë böp jaḵ rot. Yönon.

Hil Ḡaḵo Maggin Geving Kerisi Nabë Sënë

¹²Sa mehö lo-e! Vanë sën netöḵ vu ham lo, töḵ vu ham in bë seggi ham. Yönon, vonḡ bë nengwah vev raḵ ham, rëḵ mu ham su gwelëk in ngaa sënë bekwamin bo nabë ngaa yö agga ti töḵ vu ham. ¹³Gaḵ vanë sënë in bë ham

gweko maggin geving Kerisi. Om ham ngo medo los kwamin vesa, log mem are böp los vuneḵ vuneḵ yaḡek yi rēḵ natōḵ nam rangah vu tamusen. Lob tum mem ham rēḵ kwamin vesa böpata rot doḵ buk saga. ¹⁴Ham tu Kerisi-yi-alam, om nabē denaner ḡaḡek nipaya jaḵ ham in saga, og ham kwamin vesa. In Anutu yi Anon Vabuung sēn vuneḵ vuneḵ yaḡek yi degwaseḵe yi lo yök nedo ving ham. ¹⁵Gaḵ ham ti su ngis mehōnon medenadiik ma, godeḵ ngāa ma, gevonḡ ngāa nipaya aggagga ma, jaḵ ni in mehō ngwē hir ḡaḡek, lob debo vanē vu yi doḵ nah sēnē. ¹⁶Rēḵ mu nabē ham ti kerē maggin in nesepa loḵ Kerisi yi aggata, og su ni namum in, gaḵ yi alam yi om geḵo Anutu arē jaḵ. ¹⁷In buk sēn Anutu bē geḵo huk jaḵ megevonḡ nyēvewen doḵ nah mehōnon hir huk lo yam dus raḵ ggovek ya, menevonḡin bē gevonḡ vu hil sēn yi alam hil lo namuḡin. Om nabē gevonḡ nabē sēnē vu hil, og maḵ rēḵ gevonḡ nabē va vu alam sēn nengaj dahis vu Bengō Nivesa lo? Gaḵ rēḵ gevonḡ maggin nipaya verōḵ yi rot vu sir! ¹⁸In dekevu meneggēp loḵ Anutu-yi-ḵapiya nebē:

“Nabē huk böp neggēp in geḵo alam sēn denesepa loḵ ngāa niröp lo nom, og alam sēn deneruu demij vu Anutu gedenevonḡ ngāa nipaya lo og sir maḵ rēḵ nabē va?”

Gaḵ maḵ rēḵ malaj nama verōḵ yi. ¹⁹Nebē sēnē, om nabē Anutu kwa bo nabē alam la degeḵo vanē, og alam sēnē yō rēḵ desepa doḵ ngāa niröp mu, gedegevonḡ beḵenuj doḵ nah Anutu nema geving in geḡin. In yi yō tung hil, log yō rēḵ medo megevonḡ noh vu yi ḡaḡek.

Ham Ggev Gweḡin Anutu Yi Sipsip Lo

5 ¹Log gwēbeng sa bē nanēr ḡaḡek dus ti vu ham ggev lo nabē: Yiḵ sa ggev ti ving ham, log sa halē raḵ malaḡ bē Kerisi ḵo vanē. Log sa ving ham behil pin rēḵ medo nivesa los vuneḵ vuneḵ yaḡek yi doḵ ti doḵ buk sēn Mehōböp rēḵ natōḵ nom rangah vu tamusen lo. Om sēn sa bē gejiin ham ggev lo nabē: ²Ham gweḡin Anutu-yi-alam sēn denedo nebē sipsip loḵ ham nemamin lo nivesa. Rēḵ mu alam su medo denajij ham nabē ham gwevonḡ huk sēnē, gaḵ ham ngo gweḵo jaḵ megwevonḡ nivesa los kwamin vesa. Geham su gwevonḡ huk sēnē in nabē gweḵo monē mu, gaḵ ham ayomin kedi in huk sēnē nabē ham gwevonḡ niröp. ³Ham su gwevonḡ nabē ham böp beham dahun alam sēn Anutu tung loḵ ham nemamin bē ham gweḡin sir lo. Gaḵ ham gweli Anutu yi sipsip lo nivesa metato aggata vu sir medesepa doḵ ham vahamin. ⁴Bē ham gwevonḡ nabē sēnē, og sipsip alaj böp rēḵ natōḵ nom rangah, lob ham gweḵo madub nivesa los vuneḵ vuneḵ yaḡek-yi sēn malangeri rot besu rēḵ meran na rē lo.

Hil Dahun Hil Gekwad Bo Ngāa Niröp

⁵Nebē saga, om sa bē nanēr vu ham hur maḡēm geving nabē: Ham gurek alam ggev babuj. Rēḵ mu su sir maḡēm mu rē, gaḵ ham pin sepa

doḵ aggata sën ham dahun ham lo, beham los arimin pin lo ġurek babumin vewen vewen. In ġaġek sënë neggëp loḵ Anutu-yi-ḵapiya bë:

“Anutu neruuk alam sën deneḵo sir raḵ lo,
gaḵ mëm nesemu alam sën denedahun sir lo.”

⁶Anutu mehö niwëëk ata, om ham dahun ham beġurek babu, gedoḵ yö yi buk sën lo, og rëḵ geḵo ham jaḵ. ⁷Om ham bo ham maggin pin doḵ nah nema, in kwa nevo ham meneġin ham.

⁸Lob ham gweġin ham nivesa bemedo malamin ham. In ham mehö nipaya Satan neḵo loḵ rot nebë reggu böp layon sën negga mehönon lo, lob nenġeëḵ böpata geneggevek menyam in bë pesöng jaḵ hil. ⁹Om ham ngo ayomin na timu vu Anutu niwëëk bemedo in ham dev doḵ megwedu yi na. In ham neraḵ ni bë ham arimin lo pin sën denedo yoh vu dob pin agi yiḵ deneḵo vanë nebë ham. ¹⁰Semusemu pin degwa Anutu yö tahi ham yam raḵ Kerisi, in bë ham medo nivesa los gweḵo vunek vunek yaġek-yi geving yi degwata. Om yiḵ ham rëḵ gweḵo vanë yiḵ buk dus teka mu, log mëm Anutu rëḵ gevong beham nimin vesa jaḵ gökin, bebarah ham na, beġadu ham, geham medo niwëëk. ¹¹Om hil ġaḵo arë jaḵ nabë Mehö niwëëk ata degwata los degwata. Yönon.

Ġaġek Hus

¹²Sa ḵevu ġaġek dus ti sënë vu ham mesevo loḵ Silvanus* nema in bë geḵo nöḵ vu ham. In sa nehalë yi nebë hil arid, in Kerisi yi mehö yi yönon. Sa bë bër ham kwamin jaḵ beham najom Anutu yi semusën soġek sën senër rangah vu ham lo ahon beham bare nimin wëëk in. ¹³Kerisi-yi-alam vu Babulon* sën Anutu ggooïn sir raḵ ggovek ya ving ham lo kwaj nevo ham medenenër.

Log Markus sën vong bë sa naluġ lo kwa nevo ham menenër ving. ¹⁴Ham najom* sir sën Kerisi-yi-alam ham lo nemaj in tato nabë ham ahëmin neving sir. Ham sën ham tu Kerisi-yi-alam lo pin ayomin yö ġëp revuh.